


Qo'ldosh Ergashev
Hojiakbar Hamidov

O'ZBEKISTON TARIXI



**O‘ZBEKISTON RESPUBLIKASI OLIY VA O‘RTA MAXSUS
TA‘LIM VAZIRLIGI**

TOSHKENT DAVLAT IQTISODIYOT UNIVERSITETI

**Qo‘ldosh Ergashev
Hojiakbar Hamidov**

O‘ZBEKISTON TARIXI

*Oliy o‘quv yurtlari, litsey va kollej
talabalari uchun o‘quv qo‘llanma*

G‘afur G‘ulom nomidagi nashriyot-matbaa ijodiy uyi

Toshkent–2015

KIRISH

Buyuk ajdodlar vorisi bo'lmish O'zbekiston xalqi o'z mustaqilligining 23 yillicini eng ulug' va eng aziz bayram sifatida nishonladi. O'tgan bu davr o'zining mazmun-mohiyati, bunyodkorlik ko'lami va beqiyos ahamiyati bilan tarix sahifalariga zarhal harflar bilan bitilajak tom ma'nodagi buyuk evrilish bo'ldi. Tarixan qisqa, ammo asrlarga teng bu yillarda o'zbek xalqi milliy taraqqiyot yo'lidan qat'iyat va jasorat bilan qadam tashlab, barcha sinov-mashaqqatlarni yengib o'tdi va olamshumul yutuqlarga erishdi.

Tarixan qisqa davrda, avvalo, el-yurtimizning xohish-irodasi, kuch-qudrati, mashaqqatli va bunyodkorona mehnati evaziga jahon xaritasida yangi, o'z kuchi va salohiyatiga ega, bugun taraqqiyot yo'lidan barqaror sur'atlar bilan rivojlanib borayotgan mustaqil suveren O'zbekiston davlatining paydo bo'lishi, shubhasiz, o'zbek xalqining tarixiy g'alabasidir. O'zbekistonning o'ziga xos va o'ziga mos taraqqiyot yo'li – o'zbek modelining mamlakat uchun hal qiluvchi bir paytda eng to'g'ri, eng oqilona yo'l sifatida tanlangani, yurtda yashayotgan har qaysi inson, har bir oila, butun jamiyat hayotida sinovdan o'tib, amalda har tomonlama o'zini oqlagani¹, bu yo'l tufayli ulkan natijalarni butun dunyo tan olayotgani, mamlakatning xalqaro maydonda obro-e'tibori ortib, o'ziga munosib o'rin egallayotgani² O'zbekiston Respublikasi Prezidentining O'zbekiston Respublikasi Davlat mustaqilligining yigirma ikki hamda yigirma uch yillik bayramlariga tayyorgarlik ko'rish va ularni o'tkazish to'g'risidagi qarorlarida ham alohida e'tirof etildi.

Istiqlolning 23 yillik bayramini mamlakatda **“Yagonasan, muqaddas Vatanim, sevgi va sadoqatim senga baxshida, go'zal O'zbekistonim!”** shiori ostida nishonlanishi shu Vatanda yashab faoliyat yuritayotgan barcha yurtdoshlarni buyuk kelajakka ishonchini yanada mustahkamlashga xizmat qilmoqda.

¹ *Qarang:* O'zbekiston Respublikasi Prezidentining 2013-yil 12-iyundagi “O'zbekiston Respublikasi Davlat mustaqilligining yigirma ikki yillik bayramiga tayyorgarlik ko'rish va uni o'tkazish to'g'risida”gi qarori. // “Xalq so'zi”, 2013-yil 14-iyun.

² *Qarang:* O'zbekiston Respublikasi Prezidentining 2014-yil 1-iyuldagi “O'zbekiston Respublikasi Davlat mustaqilligining yigirma uch yillik bayramiga tayyorgarlik ko'rish va uni o'tkazish to'g'risida”gi qarori. // “Xalq so'zi”, 2014-yil 1-iyun.

Mustaqillik tufayli bugungi kunda jamiyatni yanada erkinlashtirish, aholining siyosiy faolligini o'zlashtirish, siyosiy madaniyatini yuksaltirish, har bir insonning hayotda o'z o'rnini topish masalalariga muhim e'tibor qaratilmoqda. Yurtboshi aytganidek: "Har bir inson o'z o'rnini bilishi, o'zini jamiyatning ajralmas qismi deb his etishi darkor"¹.

Bugun erishgan mustaqillikni mustahkamlash uchun yurt fuqarolari bir-biriga mehr-muhabbatli, vatanparvar, yurtparvar, kerak bo'lsa Vatan mustaqilligi yo'lida jon fido qilishga tayyor bo'lishlari lozim. Bunday fazilatlarini butun xalq, yurt kelajagi – yoshlar ongiga singdirish va shakllantirishda Vatanimiz tarixining o'rni va ahamiyati beqiyos. Chunki, o'z xalqi, Vatani tarixini bilgan inson g'ururli, iftixorli va vatanparvar bo'ladi. Yurtboshi aytganidek: "Inson o'zligini anglagani, nasl-nasabini bilgani sari yuragida Vatanga muhabbat tuyg'usi ildiz otib, yuksala boradi. Bu ildiz qancha chuqur bo'lsa, tug'ilib o'sgan yurtga muhabbat ham shu qadar cheksiz bo'ladi"².

O'zbek xalqi boy tarix va madaniyatga ega xalq. Bu yurt jahon sivilizatsiyasi beshiklaridan biri. Bu tabarruk tuproq ne-ne allomalarni, fozil-u fuzalolarni, olim-u ulamolarni, davlat arboblari-yu sarkardalarni yetishtirib bergan. O'zining qadim tarixida ne-ne bosqinchilik urushlarining guvohi bo'lgan, ularga qarshi ozodlik kurashlarini olib borib, hamisha o'zligini, g'ururi, tarixi, ma'naviyati, qadriyatlarini va madaniy merosini saqlab qoldi. Biz mustaqillikka erishgan bugungi kunda ana shunday yurt, xalq bilan faxrlanishga haqlimiz.

O'zbekiston tarixi buyuk ajdodlarning bugungi vorislari – yoshlarga boy tarix, madaniyat, xalqning bosib o'tgan ijtimoiy-iqtisodiy hayoti, milliy qadriyatlar, an'ana va urf-odatlar haqida chuqur ma'lumot beribgina qolmay, jonajon Vatanning istiqloldan keyingi yillarda erishgan yutuqlari, amalga oshirilayotgan islohotlar, uning bosqichlari, strategik yo'nalishlari, mustaqil davlatning olib borayotgan ichki va tashqi siyosati, bu boradagi vazifalar xususidagi bilimlarni yanada oshirib borishni ham o'z oldiga maqsad qilib qo'yadi. Bu fan talabalarni vatan tarixi, xalq o'tmishi durdonalaridan boxabar qilish bilan birga, bugungi kun haqida ularga to'liq ma'lumot beradi va kelajagi buyuk davlatning taraqqiyot yo'liga bo'lgan ishonchlarini yanada mustahkamlaydi.

Vatani tarixini bilmoq va bu zalvorli manbaning uzoq-yaqin davrlariga doir sahifalarini varaqlamoq o'zini ma'rifatli, shu yurtning jonkuyari deb bilgan har bir fuqaroning vijdon ishi hisoblanadi. Darhaqiqat, millat bo'lib shakllangan

¹ Karimov I.A. Jamiyatimiz mafkurasi xalqni-xalq, millatni-millat qilishga xizmat etsin. – T.: "O'zbekiston", 1998. – 20-b.

² Karimov I.A. Milliy istiqlol mafkurasi – xalq e'tiqodi va buyuk kelajakka ishonchdir. – T.: "O'zbekiston", 2000. – 22-b.

xalq o'z o'tmishini, ota-bobosini, hovli-joyi va qishloq-qo'rg'onining tarixini mukammal bilishi shart. Aks holda Vatan tuyg'usi shunchaki havoyi tushuncha, vatanparvarlikka da'vat esa hoy-u havasdan nariga o'tmay qolaveradi.

Prezident I.A.Karimov 2013-yil 9-may kuni ommaviy axborot vositalari vakillariga bergan intervyusida tarix va uning ahamiyati haqida to'xtalib: "Hayotning o'zi bir haqiqatni takror va takror isbotlab bermoqda. Ya'ni tarixni bilmagan, tarixini unutmagan, tarixdan xulosa chiqarmagan har qanday inson, har qanday xalq o'z yo'lidan adashishi, bir vaqtlar yo'l qo'ygan xatolarini takrorlashi mumkin"¹ ligini yana bir bor uqtirgan edi. Bugungi yoshlar ongiga yangi, xolisona yaratilgan tarixni singdirish orqali yurtning insoniyat sivilizatsiyasining dastlabki o'choqlaridan biri ekanligini, davlatchilik tarixi 3,5-4 ming yillarga borib taqalishini, ajdodlar qadim-qadimdan shu yurt sohiblari bo'lganligini, ular ne-ne bosqinchilar zulmiga bardosh berib, doimo ozodlikka intilib, kurashib yashaganliklarini; bu yurt ilm-fan o'chog'i sifatida dunyo tamaddunida o'z o'rniga ega bo'lish bilan birga jahon ilm-fan beshigini tebratgan, dunyoni lol qoldirgan allomalarni, Amir Temurdek buyuk sarkarda va davlat arboblari yetkazib berganini, bu yurt chor Rossiyasi zulmini, turg'unlik va qatag'onlar davrini boshidan o'tkazgan, nohaq tuhmatlarga bardosh bergan, baxtli, saodatli kunlarni orzu qilib yashagan yurt farzandlarining Vatani ekanligini, o'zbek xalqining ildizi mustahkam bo'lganligi bois bu xalqning, bu yurtning kelajagi albatta buyuk bo'lishini yana bir bor ta'kidlamok lozim.

O'zbek xalqining tarixi buyuk va bu buyuk tarixni haqqoniy ravishda, xolisona yoritish bugungi barcha tarixchi olimlarimizning vijdon ishidir. Bu borada oliy o'quv yurtlari nomutaxassis fakultetlarining bakalavr bosqichi talabalari uchun professor R.H.Murtazayeva tahriri ostida O'zMU professor-o'qituvchilarining (kirill alifbosida 2003-yil, lotin alifbosida 2005-yil), Toshkent Moliya instituti professor-o'qituvchilari Q.Usmonov, M.Sodiqov va S.Burhonovalarning (2006-yil) "O'zbekiston tarixi" darsliklari, R.Shamsutdinov va Sh.Karimovlarning 3 jilddan iborat "Vatan tarixi" (lotin alifbosida, 2010-yil) kitoblari talaba yoshlar uchun o'z tarixlarini o'rganishda muhim qo'llanma bo'lib xizmat qilmoqda va mazkur o'quv qo'llanma mualliflariga yuqorida nomlari zikr etilgan darsliklar asosiy yo'llanma bo'lganligini, ulardan tarixiy jarayonlarni yoritishda, shuningdek, o'quv qo'llanmaning yaratilishida, undagi qadimiy davrlarni, milliy davlatchilikning shakllanishi, o'zbek xalqining etnik shakllanishi jarayonlarini yoritishda taniqli tarixchi-

¹ Karimov I.A. Tinchlik va osoyishtalik – barcha yutuq va marralarimizning asosidir. // "Xalq so'zi", 2013-yil 10-may.